

学校的理想装备

电子图书·学校专集

校园网上的最佳资源

清词精选


e-BOOK
内部资料 非卖品

浪淘沙

李雯

杨花

金缕晓风残，素雪晴翻，为谁飞上玉雕阑？可惜章台新雨后，踏入沙间！
沾惹忒无端，青鸟空衔，一春幽梦绿萍间。暗处消魂罗袖薄，与泪轻弹。

满江红
吴伟业

蒜山怀古

沽酒南徐，听夜雨、江声千尺。记当年、阿童东下，佛狸深入。白面书生底用，萧郎裙屐偏轻敌，笑风流北府好谭兵，参军客。人事改，寒云白。旧垒废，神鸦集。尽沙沉浪洗，断戈残戟。落日楼船鸣铁锁，西风吹尽王侯宅。任黄芒苦竹打荒潮，渔樵笛。

贺新郎
病中有感

万事催华发。论龚生、天年竟夭，高名难没。吾病难将医药治，耿耿胸中热血。待洒向、西风残月。剖却心肝今置地，问华佗解我肠千结。追往恨，倍凄咽。故人慷慨多奇节。为当年、沈吟不断，草间偷活。艾灸眉头瓜喷鼻，今日须难决绝。早患苦，重来千叠。脱屣妻孥非易事，竟一钱不值何须说。人世事，几完缺。

浣溪沙
杜濬

红桥纪事

曲曲红桥涨碧流。荷花荷叶几经秋。谁翻水调唱凉州。
更欲放船何处去，平山堂下古今愁。不如歌笑十三楼。

锦堂春
归庄

燕子矶

半壁横江矗起，一舟载雨孤行。凭空怒浪兼天涌，不尽六朝声。隔岸荒
云远断，绕矶小树微明。旧时燕子还飞否？今古不胜情。

满江红
曹溶

钱唐观潮

浪涌蓬莱，高飞撼、宋家宫阙。谁荡激、灵胥一怒，惹冠冲发。点点片帆都卸了，海门急鼓声初发。似万群风马骤银鞍，争超越。江妃笑，堆成雪。蛟人舞，圆如月。正危楼湍转，晚来愁绝。城上吴山遮不住，乱涛穿到严滩歇。是英雄未死报仇心，秋时节。

八声甘州

金堡

卧病初起，将还丹霞谒别孝山

算军持、频挂到于今，已是十三年。便龙钟如许，过头拄杖，缓步难前。若个唤春归去，高柳足啼鹃。有得相留恋，也合翛然。况复吟笺寄兴，似风吹萍聚，欲碎仍圆。只使君青鬓，霜雪又勾连，叹人间支新收故，尽飞尘、赴海不能填。重相惜，后来还得，几度相怜。

风流子

上元风雨

东皇不解事，颠风雨、吹转海门潮。看烟火光微，心灰凤蜡；笙歌声咽，泪满蛟绡。吾无恙，一炉焚柏子，七碗覆松涛，明月寻人，已埋空谷；暗尘随马，更拆星桥。素馨田畔路，当年梦，应有金屋藏娇。不见漆灯续焰，蔗节生苗。尽翠绕珠围，雨阴难驻；钟鸣漏尽，杯土谁浇？问取门前流水，夜夜朝朝。

蝶恋花
宋琬

旅月怀人

月去疏帘才数尺。乌鹊惊飞，一片伤心白。万里故人关塞隔，南楼谁弄梅花笛？蟋蟀灯前欺病客。清影徘徊，欲睡何由得？墙角芭蕉风瑟瑟，生憎遮掩窗儿黑。

贺新凉
龚鼎孳

和曹实庵舍人赠柳叟敬亭

鹤发开元叟。也来看、荆高市上，卖浆屠狗。万里风霜吹短褐，游戏侯门趋走。卿与我、周旋良久。绿鬓旧颜今改尽，叹婆娑、人似桓公柳。空击碎，唾壶口。

江东折戟沉沙后。过青溪、笛床烟月，泪珠盈斗。老矣耐烦如许事，且坐旗亭呼酒。判残腊、销磨红友。花压城南韦杜曲，问球场、马弮还能否？斜日外，一回首。

桂枝香
余怀

和王介甫

江山依旧，怪卷地西风，忽然吹透。只有上阳白发，江南红豆。繁华往事空流水，最飘零、酒狂诗瘦。六朝花鸟，五湖烟月，几人消受？问千古、英雄谁又。况霸业销沉，故园倾覆。四十余年，收舞衫歌袖。莫愁艇子桓伊笛，正落叶乌啼时候。草堂人倦，画屏斜倚，盈盈清昼。

摸鱼儿
和辛幼安

最伤情、落花飞絮，牵惹春光不住。佳人缥缈朱楼下，一曲清歌何许？莺无语。谁传道、桃花人面黄金缕。霍王小女。恨芳草王孙，书生薄幸，空写断肠句。江南好，花苑繁华如故。画船多少萧鼓。吴宫花草随风雨，更有千门万户。苏台暮。君不见、夷光少伯皆尘土。斜阳无主。看鸥鸟忘机，飞来飞去，只在烟深处。

小重山
宋征舆

春流半绕凤凰台。十年花月夜，泛金杯。玉箫呜咽画船开。清风起，移掉上秦淮。客梦五更回。清砧迎塞雁，渡江来。景阳宫井断苍苔。无人处，秋雨落宫槐。

忆秦娥
杨花

黄金陌，茫茫十里春云白。春云白，迷离满眼，江南江北。来时无奈珠帘隔，去时著尽东风力。东风力，留他如梦，送他如客。

踏莎行

徐灿

芳草才芽，梨花未雨，春魂已作天涯絮。晶帘宛转为谁垂？金衣飞上樱桃树。故国茫茫，扁舟何许？夕阳一片江流去。碧云犹叠旧山河，月痕休到深深处。

唐多令

感怀

玉笛 清秋，红蕉露未收。晚香残、莫倚高楼。寒月多情怜远客，长伴我、滞幽州。小苑入边愁，金戈满旧游。问五湖、那有扁舟？梦里江声和泪咽，频洒向、故园流。

青玉案
王夫之

忆旧

桃花春水湘江渡，纵一艇，迢迢去。落日蘋光摇远浦。风中飞絮，云边归雁，尽指天涯路。故人知我年华暮，唱彻霸陵回首句。花落风狂春不住。如今更老，佳期逾杳，谁倩啼鹃诉？

玉楼春
白莲

娟娟片月涵秋影，低照银塘光不定。绿云冉冉粉初匀，玉露冷冷香自省。
荻花风起秋波冷，独拥檀心窥晓镜。他时欲与问归魂，水碧天空清夜永。

摸鱼儿
东洲桃浪

剪中流、白蘋芳草，燕尾江分南浦。盈盈待学春花靨，人面年年如故。
留春住，笑几许浮萍，旧梦迷残絮。棠桡无数。尽泛月莲舒，留仙裙在，载
取春归去。佳丽地，仙院迢迢烟雾，湿香飞上丹户。醮坛珠斗疏灯映，共作
一天花雨。君莫诉！君不见、桃根已失江南渡。风狂雨妒。便万点落英，几
湾流水，不是避秦路。

蝶恋花
岳峰远碧

自衡阳北三十里，至湘潭南六十里，岳峰浅碧，宛转入望。
见说随帆瞻九面。碧藕花开，朵朵波心现。晓月渐飞金碧颤，晶光返射
湘江练。谁遣迷云生绝巘？苍水仙踪，雾锁灵文篆。帝女修眉愁不展，深深
未许人间见。

东风无力
沈谦

南楼春望

翠密红疏，节候乍过寒食。燕冲帘，莺睨树，东风无力。正斜阳楼上独凭阑，万里春愁直。情思恹恹，纵写过新诗，难寄归鸿双翼。玉簪恩，金钿约，竟无消息。但蒙天卷地是杨花，不辨江南北。

相见欢
毛奇龄

花前顾影粼粼，水中人，水面残花片片绕人身。私自整，红斜领，茜儿巾。却讶领间巾底刺花新。

南柯子

淮西客舍接得陈敬止书，有寄

驿馆吹芦叶，都亭舞柘枝。相逢风雪满淮西。记得去年残烛照征衣。曲水流浅，盘山北望迷。长安书远寄来稀，又是一年秋色到天涯。

南乡子
陈维崧

荆州道上作

秋色冷并刀，一派酸风卷怒涛，并马三河年少客，粗豪，皂栎林中醉射雕。残酒忆荆高，燕赵悲歌事未消。忆昨车声寒易水，今朝，慷慨还过豫让桥。

虞美人
无聊

无聊笑捻花枝说，处处鹃啼血。好花须映好楼台，休傍秦关蜀栈战场开。倚楼极目添愁绪，更对东风语。好风休簸战旗红，早送鲎鱼如雪过江东。

满江红
秋经信陵君祠

席帽聊萧，偶经过、信陵祠下。正满目、荒台败叶，东京客舍。九月惊风将落帽，半廊细雨时飘瓦。柏初红、偏向坏墙边，离披打。今古事，堪悲诧。身世恨，从牵惹。倘君而尚在，定怜余也。我讵不如毛薛辈，君宁甘与原尝亚？叹侯嬴、老泪苦无多，如铅泻。

贺新郎
纤夫词

战舰排江口。正天边、真王拜印，蛟螭蟠钮。征发棹船郎十万，列郡风驰雨骤。叹间左、骚然鸡狗。里正前团催后保，尽累累、锁系空仓后。摔头去，敢摇手。

稻花恰称霜天秀。有丁男、临歧诀绝，草间病妇。此去三江牵百丈，雪浪排檣夜吼。背耐得、土牛鞭否？好倚后园枫树下，向丛祠、亟倩巫浇酒。神佑我，归田亩。

高阳台 朱彝尊

吴江叶元礼，少日过流虹桥，有女子在楼上，见而慕之，竟至病死。气方绝，适元礼复过其门，女之母以女临终之言诒叶，叶入哭，女目始瞑。友人为作传，余记以词

桥影流虹，湖光映雪，翠帘不卷春深。一寸横波，断肠人在楼阴。游丝不系羊车住，倩何人、传语青禽？最难禁。倚遍雕阑，梦遍罗衾。重来已是朝云散，怅明珠佩冷，紫玉烟沉。前度桃花，依然开满江浔。钟情怕到相思路，盼长堤、草尽红心。动愁吟。碧落黄泉，两处谁寻？

桂殿秋

思往事，渡江干。青蛾低映越山看。共眠一舸听秋雨，小簟轻衾各自寒。

消息 度雁门关

千里重关，凭谁踏遍，雁衔芦处？乱水滹沱，层霄冰雪，鸟道连句注。画角吹愁，黄沙拂面，犹有行人来去。问长途、斜阳瘦马，又穿入，离亭树。猿臂将军，鸦儿节度，说尽英雄难据。窃国真王，论功醉尉，世事都如许！有限春衣，无多山店，酹酒徒成虚语！垂杨老，东风不管，雨丝烟絮。

解佩令 自题词集

十年磨剑，五陵结客，把平生、涕泪都飘尽。老去填词，一半是、空中传恨。几曾围、燕钗蝉鬓？不师秦七，不师黄九，倚新声、玉田差近。落拓江湖，且分付、歌筵红粉。料封侯、白头无分！

忆少年

飞花时节，垂杨巷陌，东风庭院。重帘尚如昔，但窥帘人远。叶底歌莺梁上燕，一声声伴人幽怨。相思了无益，悔当初相见。

长亭怨慢 雁

结多少、悲秋俦侣，特地年年，北风吹度。紫塞门孤，金河月冷，恨谁诉？回汀枉渚，也只恋江南住。随意落平沙，巧排作、参差笋柱。别浦，惯惊移莫定，应怯败荷疏雨。一绳云杪，看字字悬针垂露。渐敲斜、无力低飘，正目送、碧罗天幕。写不了相思，又蘸凉波飞去。

紫萸香慢

屈大均

送雁

恨沙蓬、偏随人转，更怜雾柳难青。问征鸿南向，几时暖返龙庭？正有无边烟雪，与鲜飏千里，送度长城。向并门少待、白首牧羝人，正海上、手携李卿。秋声，宿定还惊。愁里月不分明。又哀笳四起，衣砧断续，终夜伤情。跨羊小儿争射，恁能到、白蘋汀？尽长天、遍排人字，逆风飞去，毛羽随处飘零，书寄未成。

长亭怨

与李天生冬夜宿雁门关作

记烧烛雁门高处。积雪封城，冻云迷路。添尽香煤，紫貂相拥夜深语。苦寒如许。难和尔，凄凉句。一片望乡愁，饮不醉、垆头驼乳。无处问长城旧主。但见武灵遗墓。沙飞似箭，乱穿向、草中狐兔。那能使、口北关南，更重作、并州门户。且莫吊沙场，收拾秦弓归去。

临江仙
彭孙遹

遣信

青琐余烟犹在握，几年香冷巾篝。此生为客几时休？殷勤江上鲤，清泪湿书邮。欲向镜中扶柳鬓，鬓丝知为谁秋？春阴漠漠锁层楼。斜阳如弱水，只管向西流。

生查子
旅夜

薄醉不成乡，转觉春寒重。鸳枕有谁同？夜夜和愁共。梦好却如真，事往翻如梦。起立悄无言，残月生西弄。

念奴娇
吴兆骞

家信至有感

牧羝沙碛。待风鬟、唤作雨工行雨。不是垂虹亭子上，休盼绿杨烟缕。
白苇烧残，黄榆吹落，也算相思树。空题裂帛，迢迢南北无路。消受水驿山
程，灯昏被冷，梦里偏叨絮。儿女心肠英雄泪，抵死偏萦离绪。锦字闺中，
琼枝海上，辛苦随穷戍。柴车冰雪。七香金犊何处？

谒金门
吴文柔

寄汉槎兄塞外

情恻恻，谁遣雁行南北？惨淡云迷关塞黑，那知春草色。细雨花飞绣陌，
又是去年寒食。啼断子规无气力，欲归归未得。

蝶恋花
王士禛

和《漱玉词》

凉夜沉沉花漏冻，欹枕无眠，渐觉荒鸡动。此际闲愁郎不共，月移窗罅春寒重。忆共锦绸无半缝，郎似桐花，妾似桐花凤。往事迢迢徒入梦，银筝断绝连珠弄。

点绛唇
春词

水满春塘，柳绵又蘸黄金缕。燕儿来去，阵阵梨花雨。
情似黄丝，历乱难成绪。凝眸处，白蘋红树，不见西洲路。

留客住

曹贞吉

鹧鸪

瘴云苦！遍五溪、沙明水碧，声声不断，只劝行人去。行人今古如织，正复何事关卿，频寄语。空祠废驿，便征衫难驻。风更雨，一发中原，杳无望处。万里炎荒，遮莫摧残毛羽。记否越王春殿，宫如如花，只今惟剩汝？子规声续，想江深月黑，低头臣甫。

贺新凉

再赠柳敬亭

咄汝青衫叟！阅浮生、繁华萧瑟，白衣苍狗。六代风流归抵撑，舌下涛飞山走。似易水、歌声听久。试问于今真姓字，但回头笑指芜城柳。休暂住，谭天口。

当年处仲东来后。断江流、楼船铁锁，落星如斗。七十九年尘土梦，才向青门沽酒。更谁是、嘉荣旧友？天宝琵琶宫监在，诉江潭憔悴人知否？今昔恨，一搔首！

暗香
李良年

绿萼梅

春才几日，早数枝开遍，笑他红白。仙径曾逢，萼绿华来记相识。修竹天寒翠倚，翻认了、暗侵苔色。纵一片、月底难寻，微晕怎消得？脉脉，清露湿。便静掩帘衣，夜香难隔。吴根旧宅，篱角无言照溪侧。只有楼边易坠，又何处、短亭风笛？归路杳，但梦绕、铜坑断碧。

青玉案
顾贞观

天然一帧荆关画，谁打稿，斜阳下？历历水残山剩也！乱鸦千点，落鸿孤咽，中有渔樵话。登临我亦悲秋者，向暮草平原泪盈把。自古有情终不化。青娥冢上，东风野火，烧出鸳鸯瓦。

夜行船
郁孤台

为问郁然孤峙者，有谁来、雪天月夜？五岭南横，七闽东距，终古江山如画。百感茫茫交集也！檐忘归、夕阳西挂。尔许雄心，无端客泪，一十八滩头流下。

钓船笛
李符

曾去钓江湖，腥浪粘天无际。浅岸平沙自好，算无如乡里。从今只住鸭
儿边，远或泛苔水。三十六陂秋到，宿万荷花里。

鹧鸪天
孔尚任

院静厨寒睡起迟，秣陵人老看花时。城连晓雨枯陵树，江带春潮坏殿基。
伤往事，写新词。客愁乡梦乱如丝。不如烟水西村舍，燕子今年宿傍谁？

台城路
纳兰性德

塞外七夕

白狼河北秋偏早，星桥又迎河鼓。清漏频移，微云欲湿，正是金风玉露。两眉愁聚。待归踏榆花，那时才诉，只恐重逢，明明相视更无语。人间别离无数。向瓜果筵前，碧天凝仁。连理千花，相思一叶，毕竟随风何处？羁栖良苦。算未抵空房，冷香啼曙。今夜天孙，笑人愁似许。

长相思

山一程，水一程，身向榆关那畔行，夜深千帐灯。风一更，雪一更，聒碎乡心梦不成，故园无此声。

蝶恋花
出塞

今古河山无定据，画角声中，牧马频来去。满目荒凉谁可语？西风吹老丹枫树。从前幽怨应无数，铁马金戈，青冢黄昏路。一往情深深几许？深山夕照深秋雨。

全缕曲
赠梁汾

德也狂生耳！偶然间、缁尘京国，乌衣门第。有酒惟浇赵州土，谁会成生此意？不信道、遂成知己。青眼高歌俱未老，向尊前、拭尽英雄泪。君不见，月如水。

共君此夜须深醉。且由他、蛾眉谣诼，古今同忌。身世悠悠何足问，冷笑置之而已！寻思起、从头翻悔。一日心期千劫在，后身缘恐结他生里。然诺重，君须记。

瑞鹤仙
蒋景祁

慈仁寺松

何年冰雪贮？看烧节为烟，团枝作麈，沧桑几经度。对伊浑不记，金元风雨。苍然如许。听涛声、鳞髯夜怒。未须愁、化石空坛，莫便吟龙飞去。无据。王孙草尽，贤士台荒，大夫封处。衣冠太古。青磷夜，赤虬语。叹支离相伴，一篝佛火。沸彻僧寮鱼鼓。做年年、送客长亭，销魂此树。

满江红
孙朝庆

过黄河

怒浪如山，正急桨、黄河争渡。看滚滚、来从天上，建领东注。手挽狂澜原不易，石填大海终何补？最堪怜、断岸泣遗黎，悲难诉。待议浚，茫无路；待议塞，浑无绪。问年来谁是，济川才具？细雨终袍全湿透，斜风破帽惊吹去。恁艰辛、犹是喜身闲，同鸥鹭。

满江红
杜诏

过渌水亭

一带寒汀，问是处、谁家庭馆？可记得、水晶帘下，绿荷香满？尽日不教东阁闭，无时肯罢西园宴。十年间、海内几词人，同游宦。奈侧帽，风情断。觉弹指，韶光换。便飘香秀笔，总随云散。何事庄生迷晓梦，重来楚客逢秋怨。正萧萧、落叶冷燕山，霜华晚。

大酺
陈崱

王府基怀古

记白驹兵，齐云火，一晌繁华何处？宫基春草绿，任莺歌花笑，更无人妒。石马苔缠，铜仙泪滴，麋鹿也曾游否？英雄消沉尽，问当年割据，霸图谁误？但赢得凄凉，五更霜角，满城风絮。乾坤真逆旅！看濠泗楼榭横江渡。又转眼、灰飞玉座，雨冷金沟，叹神京不堪重顾。万朵愁云涌，还悄把、蒋陵遮住。接直北煤山路。兴亡弹指，何况张王非故？江南庾郎一赋。

百字令
厉鹗

月夜过七里滩，光景奇绝。歌此调，几令众山皆响
秋光今夜，向桐江、为写当年高躅。风露皆非人世有，自坐船头吹竹。
万籁生山，一星在水，鹤梦疑重续。擘音遥去，西岩渔父初宿。心忆汐社沉
埋，清狂不见，使我音容独。寂寂冷萤三四点，穿过前湾茅屋。林净藏烟，
峰危限月，帆影摇空绿。随风飘荡，白云还卧深谷。

齐天乐
秋声馆赋秋声

簟凄灯暗眠还起，清商几处催发？碎竹虚廊，枯莲浅渚，不辨声来何叶。
桐飙又接。尽吹入潘郎，一簪愁发。已是难听，中宵无用怨离别。阴虫还更
切切。玉窗挑锦倦，惊响檐铁。漏断高城，钟疏野寺，遥送凉潮呜咽。微吟
渐怯。讶篱豆花开，雨筛时节。独自开门，满庭都是月。

沁园春

郑燮

恨

花亦无知，月亦无聊，酒亦无灵。把夭桃斫断，煞他风景；鹦哥煮熟，佐我杯羹。焚砚烧书，椎琴裂画，毁尽文章抹尽名。荥阳郑，有慕歌家世，乞食风情。单寒骨相难更，笑席帽青衫太瘦生。看蓬门秋草，年年破巷；疏窗细雨，夜夜孤灯。难道天公，还钳恨口，不许长吁一两声？颠狂甚，取乌丝百幅，细写凄清。

苏幕遮
蒋士铨

大明湖泛月

画船游，明月路。古历亭边，面面朱栏护。百顷明湖三万户，如此良宵，一点渔灯度。棹开时，香过处，说道周遭、荷叶青无数。却被芦花全隔住，泛遍湖湾，不见些儿露。

水调歌头
舟次感成

偶为共命鸟，都是可怜虫。泪与秋河相似，点点注天东。十载楼中新妇，九载天涯夫婿，首已似飞蓬。年光愁病里，心绪别离中。咏春蚕，疑夏雁，泣秋蛩。几见珠围翠绕，含笑坐东风？闻道十分消瘦，为我两番磨折，辛苦念梁鸿。谁知千里夜，各对一灯红。

菩萨蛮
洪亮吉

玉皇宫殿高无极，东西龙虎更番值。天上事偏多，仙人鬓亦皤。麻姑空一笑，偶自舒长爪。掐破碧桃花，花光照万家。

木兰花慢
太湖纵眺

眼中何所有？三万顷，太湖宽。纵蛟虎纵横，龙鱼出没，也把纶竿。龙威丈人何在，约空中同凭玉阑干。薄醉正愁消渴，洞庭山橘都酸。更残，黑雾杳漫漫，激电闪流丸。有上界神仙，乘风来往，问我平安。思量要栽黄竹，只平铺海水几时干？归路欲寻铁瓮，望中陡落银盘。

齐天乐
吴锡麒

游岱宿碧霞宫下

丹梯直上凌阊阖，冥冥欲通天语。白细如縠，青长不了，铁索一条来路。奇松对舞。早透顶寒涛，暗生云雨。稳著芒鞋，采芝常愿伴樵侣。仙灵今夕会好，听瑶环翠珞，飞响何处？壑引虬吟，林招鹤梦，拓出琼壶如许。秦碑汉树，要明月呼来，共论今古。海色晴边，一声鸡报曙。

满江红

题唐六如画郑元和像

百结鹑衣，叹公子、豪华非昨。曾记得，平康旧里，黄金挥霍。阿母但知钱树子，才人惯唱莲花落。幸青娥、俊眼不曾迷，团圆剧。《绣襦记》，梨园作。桃花坞，风流托。认先生小影，一般飘泊。图画莫嫌蛇足误，世情都是鹅毛薄。算不如、冷炙与残杯，贫儿乐。

丑奴儿慢

黄景仁

春日

日日登楼，一换一番春色。者似卷如流春日，谁道迟迟？一片野风吹草，草背白烟飞。颓墙左侧，小桃放了，没个人知。徘徊花下，分明记得，三五年时。是何人、挑将竹泪，粘上空枝？请试低头，影儿憔悴浸春池。此间深处，是伊归路，莫惹相思。

摸鱼子

归鸦

倚柴门，晚天无际，昏鸦归影如织。分明小幅倪迂画，点上米家颠墨。看不得。带一片斜阳，万古伤心色。幕寒萧浙。似卷得风来，还兼雨过，催送小楼黑。曾相识。谁傍朱门贵宅？上林谁更栖息？几丛枯木惊霜重，我是归飞倦翮。飞暂歇。却好趁、渔船小坐秋帆侧。旧巢应忆。笑画角声中，暝烟堆里，多少未归客！

浪淘沙

左辅

曹溪驿折桃花一枝，数日零落、裹花片片投之涪江，歌以送之
水软橹声柔，草绿芳洲。碧桃几树隐红楼。者是春山魂一片，招入孤舟。
乡梦不曾休，惹甚闲愁？忠州过了又涪州。掷与巴江流到海，切莫回头。

南浦

夜寻琵琶亭

浔阳江上，恰三更、霜月共潮生。断岸高低向我，渔火一星星。何处离声刮起？拨琵琶、千载剩空亭。是江湖倦客，飘零商妇，于此荡精灵。且自移船相近，绕回阑、百折觅愁魂。我是无家张俭，万里走江城。一例苍茫吊古，向荻花、枫叶又伤心。只琵琶响断，鱼龙寂寞不曾醒。

木兰花慢

张惠言

杨花

尽飘零尽了，何人解、当花看？正风避重帘，雨回深幕，云护轻幡。寻他一春伴侣，只断红、相识夕阳间。未忍无声委地，将低重又飞还。疏狂情性，算凄凉耐得到春阑。便月地和梅，花天伴雪，合称清寒。收将十分春恨，做一天、愁影绕云山。看取青青池畔，泪痕点点凝斑。

风流子

出关见桃花

海风吹瘦骨，单衣冷、四月出榆关。看地尽塞垣，惊沙北走；山侵溟渤，叠嶂东还。人何在？柳柔摇不定，草短绿应难。一树桃花，向人独笑；颓垣短短，曲水弯弯。东风知多少？帝城三月暮，芳思都删。不为寻春较远，辜负春阑。念玉容寂寞，更无人处；经他风雨，能几多番？欲附西来驿使，寄与春看。

渡江云
孙尔准

登北固亭

枫林红尽处，孤亭涌出，四面瞰秋光。正渴虹饮雨，两点金焦，晴翠满空江。秣陵瓜步，依稀辨、烟树微茫。残钟歇、白头僧到，闲话说齐梁。堪伤。酒旗戏鼓，都已飘零，问琼枝谁唱？只为是、一番佳丽，做出凄凉。一拳北固青如画，衔尽了、千古斜阳。题壁罢，潮声打到宫墙。

水调歌头

月夜登包山翠峰绝顶望太湖

今夕是何夕？天上玉京秋。包仙去后，遗却笙鹤在山头。七十二峰烟翠，三万千顷波浪，都作月华流。西子此中去，极目少扁舟。更何须，银汉水，写双眸。一声吹裂霜竹，唤起玉龙游。我欲乘之东下，看取玉壶天地，何处有瀛洲？身外且休问，醉酌碧花瓿。

月华清
邓廷桢

中秋月夜，偕少穆、滋圃登沙角炮台绝顶瞭楼。西风冷然，玉轮涌上，海天一色，极其大观，辄成此解

岛列千螺，舟横海鹳，碧天朗照无际。不到珠瀛，那识玉盘如此。划秋涛，长剑催寒；倚峭壁，短箫吹醉。前事，似元规啸咏，那时情思。却料通明殿里，怕下界云迷，蜃楼成市。诉与瑶阁，今夕月华烟细。泛深杯，待喝蟾停；鸣画角，忍惊蛟睡。秋霁，记三人对影，不曾千里。

东风第一枝
张维屏

木棉

烈烈轰轰，堂堂正正，花中有此豪杰。一声铜鼓催开，千树珊瑚齐列。
人游岭海，见草木、先惊奇绝。尽众芳、献媚争妍，总是东皇臣妾。气熊熊，
赤城楼堞。光灿灿，祝融旌节。丹心要伏蛟龙，正色不谐蜂蝶。天风卷去，
怕烧得、春云都热。似尉佗、英魄难消，喷出此花如血。

渡江云

周济

杨花

春风真解事，等闲吹遍，无数短长亭。一星星是恨，直送春归，替了落花声。凭阑极目，荡春波、万种春情。应笑人、春粮几许，便要数征程。冥冥。车轮落日，散绮余霞，渐都迷幻景，问收向、红窗画篋，可算飘零？相逢只有浮云好，奈蓬莱东指，弱水盈盈。休更惜，秋风吹老莼羹。

蝶恋花

络纬啼秋啼不已。一种秋声，万种秋心里。残月似嫌人未起，斜光直透罗帏底。唤起闲庭看露洗，薄翠疏红，毕竟能余几？记得春光真似绮，谁将片片随流水？

木兰花慢

董士锡

武林归舟中作

看斜阳一缕，刚送得，片帆归。正岸绕孤城，波回野渡，月暗闲堤。依稀是谁相忆，但轻魂、如梦逐烟飞。赢得双双泪眼，从教浣尽罗衣。江南几日又天涯，谁与寄相思？怅夜夜霜花，空林开遍，也只依知。安排十分秋色，便芳菲总是别离时。惟有醉将 醪，任他柔橹轻移。

踏莎行
周之琦

劝客清尊，催诗画鼓，酒痕不管衣衿污。玉笙谁与唱销魂？醉中只想瞢腾去。绮席频邀，高轩惯驻，闷来却觅栖鸦语。城头一角晋阳山，怪他青到无人处。

夜半乐

夜趋剑关，中途大雷雨，侵晨始抵宿处

暮天畏景将下，轻阴城郭，催唤雕鞍去。到万笏尖峰，晚凉佳处。坏云渐展，狂飙骤发，片时丹嶂冥迷，绛河倾注。更迎面、砰轰震雷鼓。暗中磴道曲折，蚁磨惊旋，马蹄愁误。怕小小篮舆，山灵留住。乱波趋壑，崩崖转石，一肩稳载吟魂，等闲偷度。晓钟外、羊肠忍回顾？卧想今夕，犯险虚劳，快心终阻。行不得、空惭鹧鸪语。耐炎曦、休恨汗湿齐纨缕。还倦指、几日消烦暑，邵平瓜买青门路。

高阳台
林则徐

和嶲筠前辈韵

玉粟收余，金丝种后，蕃航别有蛮烟。双管横陈，何人对拥无眠？不知呼吸成滋味，爱挑灯、夜永如年。最堪怜，是一泥丸，损万缗钱。春雷歛破零丁穴，笑蜃楼气尽，无复灰燃。沙角台高，乱帆收向天边。浮槎漫许陪霓节，看微波、似镜长圆。更应传，绝岛重洋，取次回舷。

卜算子
吴兰修

园绿万重，月不下地，夜凉独起，冰心悄然，惜无闲人同踏深翠也。辄倚横竹写之，时甲戌七月十三夜

绿翦一窗烟，夜漏如何许？碧月濛濛不到门，竹露听如雨。独自出篱根，树影拖鞋去。一点萤灯隔水青，蛩作秋僧语。

浣溪沙

吴藻

一卷离骚一卷经，十年心事十年灯。芭蕉叶上几秋声？
欲哭不成还强笑，讳愁无奈学忘情。误人犹是说聪明。

金缕曲

闷欲呼天说。问苍苍、生人在世，忍偏磨灭？从古难消豪士气，也只书空咄咄。正自检、断肠诗阅。看到伤心翻失笑，笑公然愁是吾家物。都并入，笔端结。英雄儿女原无别。叹千秋、收场一例，泪皆成血。待把柔情轻放下，不唱柳边风月。且整顿、铜琶铁拨。读罢离骚还酌酒，向大江东去歌残阕。声早遏，碧云裂。

湘月

龚自珍

壬申夏泛舟西湖，述怀有赋。时予别杭州盖十年矣
天风吹我，堕湖山一角，果然清丽。曾是东华生小客，回首苍茫无际。屠狗功名，雕龙文卷，岂是平生意？乡亲苏小，定应笑我非计。才见一抹斜阳，半堤香草，顿惹清愁起。罗袜音尘何处觅？渺渺予怀孤寄。怨去吹箫，狂来说剑，两样消魂味。两般春梦，橹声荡入云水。

鹊踏枝

过人家废园作

漠漠春芜春不住，藤刺牵衣，碍却行人路。偏是无情偏解舞，濛濛扑面皆飞絮。绣院深沉谁是主？一朵孤花，墙角明如许。莫怨无人来折取，花开不合阳春暮。

减字木兰花

偶检从纸中，得花瓣一包，纸背细书辛幼安“更能消几番风雨”一阕，乃是京师悯忠寺海棠花，戊辰暮春所戏为也，泫然得句
人天无据，被依留得香魂住。如梦如烟，枝上花开又十年。十年千里，风痕雨点斓斑里。莫怪怜他，身世依然是落花。

台城路

赋秣陵卧钟，在城北鸡笼山之麓，其重万钧，不知何代物也
山陬法物千年在，牧儿叩之声死。谁信当年，槌锤一发，吼彻山河大地。幽光灵气。肯伺候梳妆，景阳宫里？怕阅兴亡，何如移向草间置？漫漫评尽今古。便汉家长乐，难寄身世。也称人间，帝王宫殿，也称斜阳萧寺。鲸鱼逝矣。竟一卧东南，万牛难起。笑煞铜仙，泪痕辞灞水。

减字木兰花

项鸿祚

春夜闻隔墙歌吹声

阑珊心绪，醉倚绿琴相伴住。一枕新愁，残夜花香月满楼。繁笙脆管，吹得锦屏春梦远。只有垂杨，不放秋千影过墙。

湘月

壬午九月，避喧于南山之甘露院，就泉分茗，移枕看山，相羊浹旬，尘念都净。出院不百步，越小岭，即虎跑也。尝月夜独游，清寒特甚，赋《念奴娇》鬲指声一阕记之

绳河一雁，带微云淡月，吹堕秋影。风约疏钟，似唤我、同醉寺桥烟景。黄叶声多，红尘梦断，中有檀栾径。空明积水，诗愁浩荡千顷。乘兴欲叩禅关，残萤几点，颭寒星不定。清夜湖山，肯付与、词客闲来消领？跨鹤天高，盟鸥缘浅，心事塘蒲冷。朔风狂啸，满林宿鸟都醒。

百字令

将游鸳鸯湖，作此留别

啼莺催去，便轻帆东下，居然游子。我似春风无管束，何必扬舲千里？官柳初垂，野棠未落，才近清明耳。归期自问，也应芍药开矣。且去范蠡桥边，试盟鸥鹭，领略江湖味。须信西泠难梦到，相隔几重烟水。剪烛窗前，吹箫楼上，明日思量起。津亭回望，夕阳红在船尾。

水龙吟

秋声

西风已是难听，如何又著芭蕉雨？泠泠暗起，淅淅渐紧，萧萧忽住。候馆疏砧，高城断鼓，和成凄楚。想亭皋木落，洞庭波远，浑不见，愁来处。此际频惊倦旅，夜初长、归程梦阻。砌蛩自叹，边鸿自唳，剪灯谁语？莫更伤心，可怜秋到，无声更苦。满寒江剩有，黄芦万顷，卷离魂去。

早春怨
顾春

春夜

杨柳风斜，黄昏人静，睡稳栖鸦。短烛烧残，长更坐尽，小篆添些。红楼不闭窗纱，被一缕、春痕暗遮。淡淡轻烟，溶溶院落，月在梨花。

烛影摇红

听梨园太监陈进朝弹琴

雪意沉沉，北风冷触庭前竹。白头阿监抱琴来，未语眉先蹙。弹遍瑶池旧曲，韵泠泠、水流云瀑。人间天上，四十年来，伤心惨目。尚记当初，梨园无数名花簇。笙歌缥缈碧云间，享尽神仙福。太息而今老仆，受君恩、沾些微禄。不堪回首，幕景萧条，穷途歌哭。

满江红
蒋敦复

北固山题多景楼壁

第一江山，吊千古、英雄陈迹。凭阑处、秣陵秋远，广陵涛碧。杯酒尚关天下事，笑谈早定风云策。想当年、高会此孙刘，都人杰。瓜步垒，京口驿。天堑险，分南北。倚危楼一角，下临绝壁。木叶横飞风雨至，剑花起舞鱼龙出。听大江东去唱坡仙，铜琶裂。

齐天乐
陈澧

十八滩舟中夜雨

倦游谙尽江湖味，孤篷又眠秋雨。碎点飘灯，繁声落枕，乡梦更无寻处。幽蛩不语，只断苇荒芦，乱垂烟渚。一夜潇潇，恼人最是绕堤树。清吟此时正苦。渐寒生竹簟，秋意如许。古驿疏更，危滩急溜，并作天涯离绪。归期又误。望庚岭模糊，湿云无数。镜里明朝，定添霜几缕。

甘州

渐斜阳、淡淡下平堤，塔影浸微澜。问秋坟何处？荒亭叶瘦，废碣苔斑。一片零钟碎梵，飘出旧禅关。杳杳松林外，添作霜寒。须信竹根长卧，胜丹成远去，海上三山。只一抔香，占断小林峦。似家乡、水仙祠庙，有西湖为镜照华鬢。休肠断，玉妃烟雨，谪堕人间。

林兰花慢

蒋春霖

江行晚过北固山

泊秦淮雨霁，又灯火、送归船。正树拥云昏，星垂野阔，暝色浮天。芦边、夜潮骤起，晕波心月影荡江圆。梦醒谁歌楚些，泠泠霜激哀弦。婵娟，不语对愁眠。往事恨难捐。看莽莽南徐，苍苍北固，如此山川！钩连、更无铁锁，任排空、檣櫓自回旋。寂寞鱼龙睡稳，伤心付与秋烟。

卜算子

燕子不曾来，小院阴阴雨。一角阑干聚落花，此是春归处。弹泪别东风，把酒浇飞絮。化了浮萍也是愁，莫向天涯去。

清平乐

琐窗朱户，夜定人初去。满院商声无觅处，梧叶堆中虫语。微寒乍掩屏纱，西风孤怯灯花。不是悲秋泪少，如今住惯天涯。

琵琶仙

五湖之志久矣，羈累江北，苦不得去。岁乙丑，偕婉君泛舟黄桥，望见烟水，益念乡土。谱白石自度曲一章，以箜篌按之。婉君曾经丧乱，歌声甚哀

天际归舟，悔轻与、故国梅花为约，归雁啼入箜篌，沙洲共飘泊。寒未减、东风又急，问谁管、沈腰愁削？一舸青琴，乘涛载雪，聊共斟酌。更休怨、伤别伤春，怕垂老心期渐非昨。弹指十年幽恨，损萧娘眉萼。今夜冷、篷窗倦倚，为月明、强起梳掠。怎奈银甲秋声，暗回清角！

永遇乐
周星誉

登丹凤楼怀陈忠愍公

放眼东南，苍茫万感、奔赴栏底。斗大孤城，当年曾此、笳鼓屯千骑。
劫灰飞尽，怒潮如雪，犹卷三军痛泪。满江头，阵云团黑，蛟龙敢啗残垒。
登临狂客，高歌散发，唤得英雄都起。天意倘教、欲平此虏，肯令将军死。
只今回首，笙歌依旧，一片残山剩水。伤心处，青天无语，夕阳千里。

秋霁
张景祁

基隆秋感

盘岛浮螺，痛万里胡尘，海上吹落。锁甲烟销，大旗云掩，燕巢自惊危幕。乍闻唳鹤，健儿罢唱从军乐。念卫霍，谁是汉家图画壮麟阁？遥望故垒，毳帐凌霜，月华当天，空想横槊。卷西风、寒鸦阵黑，青林凋尽怎栖托？归计未成情味恶。最断魂处，惟见莽莽神州，幕山衔照，数声哀角。

曲江秋
马江秋感

寒潮怒激。看战垒萧萧，都成沙碛。挥扇渡江，围棋赌墅，诧纶巾标格。烽火照水驿。问谁洗、鲸波赤？指点麈兵处，墟烟暗生，更无渔笛。嗟惜，平台献策。顿销尽、楼船画鹢。凄然猿鹤怨，旌旗何在？血泪沾筹笔。回望一角天河，星辉高拥乘槎客。算只有鸥边，疏荇断蓼，向人红泣。

清平乐

春雷殷地，玉女投壶戏。一朵红云飞不起，压著蟠根仙李。百年乔木谁栽？迎风帘幕轻开。燕子不知人世，犹寻旧日楼台。

蝶恋花
庄棫

城上斜阳依碧树。门外斑骓，见了还相顾。玉勒珠鞭何处住？回头不觉春将暮。风里余花都散去。不省分开，何日能重遇？凝睇窥君君莫误，几多心事从君诉。

百丈游丝牵别院。行到门前，忽见韦郎面。欲待回身钗乍颤，近前却喜无人见。握手匆匆难久恋。还怕人知，但弄团团扇。强得分开心暗战，归时莫把朱颜变。

绿树阴阴晴昼午。过了残春，红萼谁为主？宛转花幡勤拥护，帘前错唤金鹦鹉。回首行云迷洞户。不道今朝，还比前朝苦。百草千花羞看取，相思只有侬和汝。

金缕曲

谭献

江干待发

又指离亭树。恁春来、消除愁病，鬓丝非故。草绿天涯浑未遍，谁道王孙迟暮？肠断是、空楼微雨。云水荒荒人草草，听林禽、只作伤心语。行不得，总难住。

今朝滞我江头路。近篷窗、岸花自发，向人低舞。裙衩鞭蓉零落尽，逝水流年轻负。渐惯了、单寒羁旅。信是穷途文字贱，悔才华、却受风尘误。留不得，便须去。

桂枝香

秦淮秋感

瑶流自碧，便作就可怜，如许秋色。只是烟笼水冷，后庭歌歇。帘波淡处留人影，袅西风、数声长笛。彩旗船舫，华灯鼓吹，无复消息。念旧事、沉吟省识。问曾照当年，惟有明月。拾翠汀洲，密意总成萧瑟。秦淮万古多情水，奈而今秋燕如客。望中何限，斜阳衰草，大江南北。

喝火令
宝廷

衰草连荒垒，寒林绕故关。角声呜咽晚风酸。遥见征人无数，曝背古城边。朔气侵金甲，严霜冷玉鞍。停鞭一望更凄然。几点旌旗，几点夕阳山，几点颓垣断壁，掩映幕云间。

浣溪沙

冯煦

琼岛冥冥隔雾中，兰桡去后绿波空，旧湔裙处一相逢。
化鹤千年无返翼，灵犀一点有心通。莫将消息误东风。
几日偷窥宋玉墙，吴姬学步剧郎当。更扶残梦下潇湘。
燕外笑桃和雨散，莺边舞絮逐风狂。争知前度有刘郎。

齐天乐

三月九日作

庚郎先自伤迟暮，东风又吹羁绪。别屿帆空，孤谯角暗，赢得断萍零絮。
鹃啼正苦。奈雨暝烟昏，梦归无据。双屐才回，李花又送隔墙去。弹棋昨经
别墅，是谁持急劫，将断还误。客燕无依，群莺自扰，争忍东皇辜负。哀弦
漫抚。恁弹彻霜辰，更无人寤。望极扶桑，海天浑未曙。

双双燕
黄遵宪

题兰史《罗浮纪游图》

罗浮睡了，试召鹤呼龙，凭谁唤醒？尘封丹灶，剩有星残月冷。欲问移家仙井，何处觅、风鬟雾鬓？只应独立苍茫，高唱万峰峰顶。荒径，蓬蒿半隐。幸空谷无人，栖身应稳。危楼倚遍，看到云昏花暝。回首海波如镜，忽露出、飞来旧影。又愁风雨合离，化作他人仙境。

念奴娇

王鹏运

登眺台山绝顶望明陵

登临纵目，对川原绣错，如接襟袖。指点十三陵树影，天寿低迷如阜。一霎沧桑，四山风雨，王气消沉久。涛生金粟，老松疑作龙吼。惟有沙草微茫，白狼终古，滚滚边墙走。野老也知人世换，尚说山灵呵守。平楚苍凉，乱云合沓，欲酹无多酒。出山回望，夕阳犹恋高岫。

满江红

送安晓峰侍御谪戍军台

荷到长戈，已御尽、九关魑魅。尚记得、悲歌请剑，更阑相视。惨淡烽烟边塞月，蹉跎冰雪孤臣泪。算名成、终竟负初心，如何是？天难问，忧无已。真御史，奇男子。只我怀抑塞，愧君欲死。宠辱自关天下计，荣枯休论人间世。愿无忘、珍惜百年身，君行矣。

沁园春

岛佛祭诗，艳传千古。八百年来，未有为词修祀事者。今年辛峰来京度岁，倡酬之乐，雅擅一时。因于除夕，陈词以祭，谱此迎神，而以送神之曲属吾弟焉

词汝来前！酌汝一杯，汝敬听之。念百年歌哭，谁知我者？千秋沆瀣，若有人兮。芒角撑肠，清寒入骨，底事穷人独坐诗？空中语，问绮情忏否？几度然疑。玉梅冷缀莓枝，似笑我吟魂荡不支。叹春江花月，竞传宫体；楚山云雨，枉托微词。画虎文章，屠龙事业，凄绝商歌入破时。长安陌，听喧阗闾鼓，良夜何其？

浪淘沙

自题《庚子秋词》后

华发对山青，客梦零星，岁寒濡响慰劳生。断习愁肠谁会得？哀雁声声。心事共疏檠，歌断谁听？墨痕和泪渍清冰。留得悲秋残影在，分付旗亭。

渡江云
沈曾植

赠文道希

十分春已去，孤花隐叶，恹恹倚阑心。客游今倦矣。珍重韶光，还共醉花阴。长亭短堠，向从来、雨黯烟沉。人何处？匣中宝剑，挂壁作龙吟。登临。秦时明月，汉国山河，尽云寒雁唳。行不得、鹧鸪啼晚，苦竹穿林。寻常总道归帆好，者归帆、愁与潮深。苍然暮，高山流水鸣琴。

蝶恋花 文廷式

九十韶光如梦里，寸寸关河，寸寸销魂地。落日野田黄蝶起，古槐丛获摇深翠。惆怅玉箫催别意，蕙些兰骚，未是伤心事。重叠泪痕缄锦字，人生只有情难死。

八声甘州

送志伯愚侍郎赴乌里雅苏台参赞大臣之任，同盛伯羲祭酒、王幼霞御史、沈子培刑部作

响惊飙、越甲动边声，烽火照甘泉。有六韬奇策，七擒将略，欲画凌烟。一枕蓍腾短梦，梦醒却欣然。万里安西道，坐啸清边。策马冻云阴里，谱胡笳一曲，凄断哀弦。看居庸关外，依旧草连天。更回首、淡烟乔木，问神州、今日是何年？还堪慰，男儿四十，不算华颠。

祝英台近

剪蛟绡，传燕语，黯黯碧云暮。愁望春归，春到更无绪。园林红紫千千，放教狼藉，休但怨、连番风雨。谢桥路，十载重约钿车，惊心旧游误。玉佩尘生，此恨奈何许。倚楼极目天涯，天涯尽处，算只有蒙蒙飞絮。

摸鱼儿 惜春

恁啼鹃、苦催春去，春城依旧如画。年年芳草横门路，换却王孙驄马。春思乍，甚絮乱丝繁，又过寒食也。残阳易下。好飞盖西园，玉觞满引，秉烛共游夜。琼楼迥，孤负絨词锦帕，铜仙铅泪休泻。落红可及庭阴绿？付与流莺清话。歌舞罢，便熨体春衫，今日从弃舍。雕鞍暂卸。纵行遍天涯，梦魂惯处，犹恋旧亭榭。

永遇乐 秋草

落日幽州，凭高望处，秋思何限。候雁哀鸣，惊麋昼窜，一片飞蓬卷。西风万里，逾沙越漠，先到鞞难河畔。但苍然、平皋接轸，玉关消息初断。千秋只有，明妃上，长是青青未染。闻道胡儿，祁连每过，泪落笳声怨。风霜未改，关河犹昔，汗马功名今贱。惊心是、南山射虎，岁华易晚。

鹧鸪天 赠友

万感中年不自由，角声吹彻古梁州。荒苔满地成秋苑，细雨轻寒闭小楼。诗漫与，酒新苞，醉来世事一浮沤。凭君莫过荆高市，溱水无情也解愁。

贺新郎

别拟西洲曲，有佳人、高楼窈窕，靓妆幽独。楼上春云千万叠，楼底春波如縠。梳洗罢、卷帘游目。采采芙蓉愁日暮，又天涯芳草江南绿。看对对、文鸳浴。

侍儿料理裙腰幅，道带围、近日宽尽，眉峰长蹙。欲解明珰聊寄远，将解又还重束。须不羨、陈娇金屋。一霎长门辞翠辇，怨君王已失荂华玉。为此意，更踟躅。

湘月
郑文焯

山塘秋集，分题得坏塔

夜铃语断，更斜阳瘦影，谁问今古。独立苍茫，镇占老，一角青山无主。衰草丛生，枯枫倒出，时见归禽度。残烽零劫，仗他半壁支柱。长见峭倚荒天，凄凉如笔，写愁边风雨。不许登临，怕倦客、题遍伤心秋句。卧影空丘，招魂破寺，剩有孤云驻。梦痕飞上，故王台榭何处。

玉楼春

梅花过了仍风雨，著意伤春天不许。西园词酒去年同，别是一番惆怅处。一枝照水浑无语，日见花飞随水去。断红还逐晚潮回，相映枝头红更苦。

贺新郎
秋恨

暗雨凄邻笛。感秋魂，吟边憔悴，过江词客。非雾非烟神州渺，愁入一天冤碧。梦不到、青芜故国。休洒西风新亭泪，障狂澜、犹有东南壁。空掩袂，望云北。

雕栏玉砌都陈迹。黯重扃、夷歌野哭，晦冥朝夕。十万横磨今安在？赢得胡尘千尺。问天地、榛荆谁辟？夜半有人持山去，暮崩舟、坠壑蛟龙泣。还念此，断肠直。

鹧鸪天

余与半塘老人有西崦卜邻之约。人事好乖，高言在昔，款然良对，感述前游，时复凄绝

谏草焚馀老更狂，西台痛哭恨茫茫。秋江波冷容鸥迹，故国天空到雁行。诗梦短，酒悲长。青山白发又殊乡。江南自古伤心地，未信多才累庾郎。

长亭怨慢

朱祖谋

苇湾重到，红香顿稀，和半塘老人

消尽，涉江情绪。风露年年，国西门路。绀海凉云，昨宵飞浣石亭暑。乱蝉高柳，凄咽断、蘋洲谱。莫唱惜红衣，算一例、飘零如雨。迟暮，隔微波不恨。恨别旧家鸥侣。青墩梦断，柱赢得、去留无据。试巡遍往日阑干，总无着、鸳鸯眠处。剩翠盖亭亭，消受斜阳如许。

乌夜啼

春云深宿虚坛，磬初残。步绕松阴，双引出朱栏。吹不断，黄一线，是桑干。又是夕阳无语下苍山。

齐天乐

鸦

半天寒色黄昏后，平林渐添愁点。倦影偎烟，酸声噤月，城北城南尘满。长安岁晏，又啼入延秋，故家啄遍。问几斜阳，玉颜凄诉旧团扇。南飞虚羨越鸟，乱烽明似炬，空外惊散。坏阵秋盘，虚舟暝踏，何处衰杨堪恋？江关梦短，怕头白年年，旧巢轻换。独鹤归无？后栖休恨晚。

石州慢

用东山韵

一枕春醒，相伴画堂，羁绪天阔。江南信息沉沉，水驿芳梅谁折。荒阑偎久。未信笛里关山，玉龙犹噤黄昏雪。空外暮笳声，送飘灯时节。歌发，闹红香榭，归鹤春城，顿忘离别。留恋斜阳，只有鹃声凄绝。不知临镜，画出几许宫眉，新妆消与愁千结。拥髻已无言，又窥人黄月。

声声慢

辛丑十一月十九日，味聃赋《落叶词》见示，感和

鸣蜩颓城，吹蝶空枝，飘蓬人意相怜。一片离魂，斜阳摇梦成烟。香沟旧题红处，拚禁花、憔悴年年。寒信急，又神宫凄奏，分付哀蝉。终古巢无分，正飞霜金井，抛断缠绵。起舞回风，才知恩怨无端。天阴洞庭波阔，夜沉沉、流恨湘弦。摇落事，向空山、休问杜鹃。

金缕曲

书感寄王病山秦晦鸣

斗柄危楼揭。望中原、盘雕没处，青山一发。连海西风掀尘黯，卷入关榆悴叶。尚遮定、浮云明灭。烽火十三屏前路，照巫间知是谁家月。辽鹤语，正呜咽。微闻殿角春雷发。总难醒、十州浓梦，桑田坐阅。衔石冤禽寒不起，满眼秋鲸鳞甲。莫道是、昆池初劫。负壑藏舟寻常事，怕苍黄、柱触共工折。天外倚，剑花裂。

齐天乐
况周颐

秋雨

沈郎已自拚憔悴，惊心又闻秋雨。做冷欺灯，将愁续梦，越是宵深难住。千丝万缕。更搀入虫声，搅人情绪。一片萧骚，细听不是故园树。沉沉更漏渐咽，只檐前铁马，幽愁如诉。倘是残春，明朝怕有飞花飞絮。天涯倦侣。记滴向篷窗，更加凄苦。欲谱潇湘，黯愁生玉柱。

浣溪沙

重到长安景不殊，伤心料理旧琴书。自然伤感强欢娱。
十二回栏凭欲遍，海棠浑似故人姝。海棠知我断肠无？

鹧鸪天

苦恨花枝照酒杯，名花谁见老风埃。凭伊满地飘红雨，消得春人爱惜来。
惊岁晚，又春回。伤心长是强颜开。芙蓉城阙知何处，说到神仙事可哀。

摸鱼儿

咏虫

古墙阴、夕阳西下，乱虫萧飒如雨。西风身世前因在，尽意哀吟何苦？谁念汝？向月满花香，底用凄凉语？清商细谱。奈金井空寒，红楼自远，不入玉笋柱。闲庭院，清绝却无尘土，料量长共秋住。也知玉砌雕栏好，无奈心期先误！愁漫诉，只落叶空阶，未是消魂处。寒催堠鼓。料马邑龙堆，黄沙白草，听汝更酸楚。

望海潮
谭嗣同

自题小影

曾经沧海，又来沙漠，四千里外关河。骨相空谈，肠轮自转，回头十八年过。春梦醒来么？对春帆细雨，独自吟哦。惟有瓶花，数枝相伴不须多。寒江才脱渔蓑。剩风尘面貌，自看如何？鉴不因人，形还问影，岂缘醉后颜酡。拔剑欲高歌。有几根侠骨，禁得揉搓？忽说此人是我，睁眼细瞧科。

木兰花慢

黄人

问情为何物，深似海，几人沉？算麝到成尘，蚕空遗蜕，生死相寻。英雄拔山盖世，也喑哑叱咤变哀吟。何况痴男怨女，天荒地老恹恹。沾襟。有千丝万缕系双心。总慧多福少，别长会短，欢浅愁深。无论人间天上，便一般煮鹤与焚琴。牛女离长间岁，纯狐寡到如今。

风流子

城西见杨柳

西风添旅感，寻秋去，信步出胥关。看夹道垂杨，悄无生意，丝多仍扰，絮去无还。空移得、章台千万树，毕竟托根难。暗蘸飞尘，乱牵衰草，不知摇落，尚赌眉湾。凉蝉凄如语，道金销翠减，愁绪难删。从此流莺情薄，系马游阑。只瘦蝶怜伊，奈何频唤，离筵送客，攀折更番。莫把当初眉样，做与人看。

水龙吟
王允皙

甲午十月，辽沈边报日急，偶过琴南冷红斋闲话，感时忆旧，同赋
高斋不闭空寒，何人问取垂杨意。清霜未落，北风渐紧，丛丛芳翠。地
冷无花，城空多雁，斜阳千里。祇故人此际，萧然语罢，将丝鬓，临流水。
何限闲愁待寄，有繁华，旧时尘世。斜阶拥叶，危亭欹树，秋来如此。病后
逢杯，梦中听角，沉吟暗起。算十年心事，江湖醉约，倦鸥能记。

三姝媚
王允皙

下平羌峡

凉烟秋满灞，出平羌、山光水光如画。近绿遥青，衬小滩蓑笠，夕阳桑柘。雁路高寒，闲动了、江湖情话。半世天涯，无福移家，海棠香社。前渡嘉州来也！指竹里龙泓，酒乡鸥榭。一段天西，想万苍千翠，定通邛雅。断塔林梢，诗思在乌尤山下。淡淡青衣渔火，寒钟正打。

甘州
寺夜

任西风、吹老旧朝人，黄花十分秋。自江程换了，斜阳瘦马，古县龙游。旧梦今无半月，蔬菜满荒丘。一笠青山影，留我僧楼。次第重阳近也！记去年此际，海水西流。问长星醉否？中酒看吴钩。度今宵、雁声微雨，赖碧云红叶识乡愁。清钟动，有无穷事，来日神州。

风入松

陈洵

重九

人生重九且为欢，除酒欲何言？佳辰惯是闲居觉，悠然想、今古无端。
几处登临多事，吾庐俯仰常宽。菊花全不厌衰颜，一岁一回看。白头亲友垂
垂尽，尊前问、心素应难。败壁哀蛩休诉，雁声无限江山。

贺新郎

梁启超

昨夜东风里，忍回首、月明故国，凄凉到此！鹑首赐秦寻常梦，莫是钧天沉醉。也不管、人间憔悴。落日长烟关寒黑，望阴山、铁骑纵横地。汉帜拔，鼓声死。

物华依旧山河异。是谁家、庄严卧榻，尽伊鼾睡！不信千年神明胄，一个更无男子。问春水、干卿何事。我自伤心人不见，访明夷、别有英雄泪。鸡声乱，剑光起。

暗香

延平王祠古梅，相传王生时物也

东风正恶。算几回吹老，南枝残萼。水浅月黄，长是先春自开落。二百年前旧梦，早冷却、栖香罗幕。但剩得、片片倩魂，和雪度溪约。依约。共瘦削。便撩乡愁，驿使难托。鸾谿写罢，闲煞何郎旧池阁。休摘苔枝碎玉。怕中有、归来辽鹤。万一向、寒夜里，伴人寂寞。

水龙吟
陈锐

题大鹤山人《樵风乐府》

十年雪涕神州，气酣西蹴昆仑倒。素商夜起，潜蛟暗舞，危弦苦调。乱插繁花，时温浊酒，自成凄悄。为一闲放汝，掉头高咏，苍茫处，无人到。回首东华尘渺，溯题襟旧游都老。尧章歌曲，玉田身世，最伤怀抱。占得吴城，荒园半亩，尽堪愁了。怕茂陵他日，人间流落，有相如稿。

解连环
麦孟华

酬任公，用梦窗留别石帚韵

旅怀千结，数征鸿过尽，暮云无极。怪断肠、芳草萋萋，却绿到天涯，
酿成春色。尽有轻阴，未应恨、浮云西北。只鸾钗密约，凤屣旧尘，梦回凄
忆。年华逝波渐掷。叹蓬山路阻，乌盼头白。近夕阳、处处啼鹃，更铲地乱
红，暗帘愁碧。怨叶相思，待题付、西流潮汐。怕春波、载愁不去，恁生见
得？

虞美人
张尔田

天津桥上鹧啼苦，遮断天涯路。东风竟日怕凭阑，何处青山一发是中原？
酒醒梦绕屏山冷，独自恹恹病。故园今夜月胧明，满眼干戈休照国西营。

木兰花慢
尧化门外车中赋

倚鞍天似醉，问何地，著羁才？看乱雪荒壕，春鹃泪点，残梦楼台。低
回笛中怨语，有梅花、休傍故园开。燕外寒欺酒力，莺边暖阁吟怀。惊猜。
鬓缕霜埃。杯暗引，剑空埋。甚萧瑟兰成，江关投老，一赋谁哀？秦淮。旧
时月色，带栖乌、还过墙来。莫向危帆北睇，山青如发无涯。

金缕曲

金天羽

为瞿安题《风洞山传奇》

帝子花消歇。莽南天、蛮烟春瘴，杜鹃凄绝。从古流离家国事，偏惹鸾
叱凤泣。只难望、将军死贼。汉腊存亡天一角，数降王谱系羞从逆。还夺我，
女儿节。忠魂碧汉旌幢立。猛回头、残山拱木，血花凝碧。种界灵魂儿女共，
埋玉埋名可惜。厮守着、茅庵半壁。后死余生丁末日，一蒲团了却氤氲牒。
亡国恨，永难灭。

壶中天

灌口二郎神庙

苍崖壁立，放盘涡、激作蹴天惊浪。十丈灵旗天半舞，秦守声威犹壮。
万马嘶空，三犀蹲谷，风簸绳桥盪。龙门劈破，禹功崭绝能仿。我欲照见重
泉，峥嵘水府，桎梏支祈状。西蜀古来神秘国，飒爽英姿在望。玉垒云封，
青城月照，法驾长来往。荒祠夺席，封神幻出台榜。

浪淘沙
沈鹊应

悼晚翠

报国志难酬，碧血谁收。篋中遗稿自千秋。肠断招魂魂不到，云暗江头。
绣佛旧妆楼，我已君休。万千悔恨更何尤。拼得眼中无限泪，共水长流。

菩萨蛮

旧时月色穿帘幙，那堪镜里颜非昨。掩镜检君诗，泪行沾素衣。明灯空照影，幽恨无人省。辗转梦难成，漏残天又明。

昭君怨
秋瑾

恨煞回天无力，只学子规啼血。愁恨感千端，拍危栏。
枉把栏干拍遍，难诉一腔幽怨。残雨一声声，不堪听！

满江红

小住京华，早又是、中秋佳节。为篱下、黄花开遍，秋容如拭。四面歌
残终破楚，八年风味徒思浙。苦将侬、强派作蛾眉，殊未屑。身不得，男儿
列。心却比，男儿烈。算平生肝胆、常因人热。俗子胸襟谁识我？英雄末路
当磨折。莽红尘、何处觅知音？青衫湿。

蝶恋花
高旭

芳华满眼，而旧时双燕迟迟未来，书以讯之
多谢好风传一语，觅到乌衣，定在斜阳处。纵使天涯抛别绪，也应怜我
无侑侣。祇怕海东波浪阻，卷上珠帘，终日劳延仁。风景南朝留几许？主人
情重难忘汝。

桃源忆故人
和无闷韵即答

斜阳影里伤心赋，默数痴天无语。泪湿暮云春树，重认分携处。东风无
赖添愁绪，零落乱红难数。落时犹自争飞舞，青鸟休衔去。

蝶恋花
王国维

昨夜梦中多少恨，细马香车，两两行相近。对面似怜人瘦损，众中不惜
攀帷问。陌上轻雷听渐隐，梦里难从，觉后那堪讯。蜡泪窗前堆一寸，人间
只有相思分。

少年游

垂杨门外，疏灯影里，上马帽檐斜。紫陌霜浓，青松月冷，炬火散林鸦。
酒醒起看西窗上，翠竹影交加。跌宕歌词，纵横书卷，不与遣年华。

蝶恋花

窗外绿阴添几许？剩有朱樱，尚系残春住。老尽莺雏无一语，飞来衔得
樱桃去。坐看面梁双燕乳。燕语呢喃，似惜人迟暮。自是思量渠不与，人间
总被思量误。

点绛唇

屏却相思，近来知道都无益。不成抛掷，梦里终相觅。
醒后楼台，与梦俱明灭。西窗白，纷纷凉月，一院丁香雪。

蝶恋花

独向沧浪亭外路，六曲阑干，曲曲垂杨树。展尽鹅黄千万缕，月中并作
蒙蒙雾。一片流云无觅处，云里疏星，不共云流去。闭置小窗真自误，人间
夜色还如许！

浣溪沙

本事新词定有无？斜行小草字模糊。灯前肠断为谁书？
隐几窥君新制作，背灯数妾旧欢娱。区区情事总难符。

浣溪沙
陈曾寿

孤山看梅

心醉孤山几树霞，有阑干处有横斜，几回坚坐送年华？
似此风光惟强酒，无多涕泪一当花，笛声何苦怨天涯。

临江仙

修得南屏山下住，四时花雨迷濛。溪山幽绝梦谁同？人间闲夕照，消得一雷峰，极目寥天沉雁影，断魂凭证疏钟。淡云来往月朦胧。藕花风不断，三界佛香中。

金缕曲

李息

留别祖国

被发佯狂走。莽中原、暮鸦啼彻，几枝衰柳。破碎山河谁收拾？零落西风依旧。便惹得、离人消瘦。行矣临流重太息，说相思、刻骨双红豆。愁黯黯，浓于酒。

漾情不断淞波溜。恨年年、絮飘萍泊，遮难回首。二十文章惊海内，毕竟空谈何有。听匣底、苍龙狂吼。长夜凄风眠不得，度群生那惜心肝剖。是祖国，忍辜负。

满江红

皎皎昆仑，山顶月、有人长啸。看囊底、宝刀如雪，恩仇多少。双手裂开貔鼠胆，寸金铸出民权脑。算此生、不负是男儿，头颅好。荆轲墓，咸阳道。聂政死，尸骸暴。尽大江东去，余情还绕。魂魄化成精卫鸟，血花溅作红心草。看从今、一担好山河，英雄造。

祝英台近

吕碧城

缢银瓶，牵玉井，秋思黯梧苑。蘸绿拏芳，梦堕楚天远。最怜娥月含颦，一般消瘦，又别后、依依重见。

倦凝眄，可奈病叶惊霜，红兰泣骚畹。滞粉粘香，绣屐悄寻遍。小阑人影凄迷，和烟和雾，更化作、一庭幽怨。

过旧都作
汨罗怨

翠拱屏嶂，红迳宫墙，犹见旧时天府。伤心麦秀，过眼沧桑，消得客车延伫。认斜阳、门巷乌衣，匆匆几番来去？输与寒鸦，占取垂杨终古。闲话南朝往事，谁踵清游，采香残步。汉宫传蜡，秦镜荧星，一例穠华无据。但江城、零乱歌弦，哀入黄陵暮雨。还怕说、花落新亭，鹧鸪啼苦。

惜红衣
庞树柏

读王半塘《庚子秋词》感赋，仍用白石韵

画角吹尘，狂花卷日，俊游无力。独上高楼，千山暮云碧。歌离吊远，空老却、京华词客。凄寂。肠断楚兰，问夫君消息。秋风九陌。落叶哀蝉，深宫乱芜碧。霓旌翠辇去国。指西北。往事怕谈天宝，多少鬢丝经历。剩墨华和泪，难辨旧时颜色。

水调歌头

和鹤公《夜梦登黄鹤楼》韵

喝起汉时月，还照旧江山。不知今夕何夕，同舞剑华寒。难得牙旗玉帐，据此上游形胜，警燧尚连天。骑鹤会飞去，云外一凭栏。茫茫看，楼阁下，水光连。漫歌崔颢题句。重谱大刀环。为想西风破帽，与子谈兵呼酒，何日此身闲？回首梦游事，双鬓恐苍然。

念奴娇
孙景贤

倚虹丈归自京师，邀同闲话小窗情话，倩池波、深照随鸥纱帽。我亦春明门外客，乍听秋风归早，画省香炉，青楼弦管，梦里容西笑。金銮莫问，近来愁事多少。闻道酒劝长星，万年天子，玉几眠初觉。告急床头如火急，不待银虬催晓。解甲男儿，签名臣妾，吟尽伤心稿，石城佳气，坐看葱郁江表。

临江仙

吴梅

短衣羸马边尘紧，五年三渡桑干。漫天晴雪扑归鞍。旗亭呼酒，黄月大如盘。苦对南云思旧雨，杏花消息阑珊。新词琢就付双鬟。紫箫声里，看遍六朝山。

桂枝香

登扫叶楼倚王介甫体

凭高岸帻。爱面郭小楼，红树林隙。妆点晴峦古画，二分秋色。高人去后阑干冷，笑斜阳、往来如客。野花盈路，当时俊侣，梁燕能识。但破屋、西风四壁。对如此江山，谁伴幽寂？湖海元龙未老，醉嫌天窄。笛中唱到《渔歌子》，剩无多、金粉堪惜。暮寒人远，何时重认，旧家裙屐。

绮罗香
邵瑞彭

晚过神武门，残荷欲尽，秋意可怜

汎瑟烟昏，欹盘露冷，一镜愁漪低护。梦堕瑶台，长恐万妆争妒。念佳人、路隔西风，思帝子、讯沉北渚。怕相逢、恨并秋魂，月明遥夜耿无语。宫沟谁写泪叶？回首霓裳换叠，繁华轻误。玉簫香消，零落袜尘残步。便立尽门外斜阳，又暗惊、晚来疏雨。问涉江、此际闻歌。断肠君信否？

忆旧游

汪东

记熏炉永昼，露槛娇春，帘影偎花。断角吹离恨，甚孤帆箭激，万里江涯。旧欢更入遥梦，寒雨忽欹斜。算过翼华年，流云胜赏，两鬓堪嗟。思家。路迢递，且唤酒旗亭，重醉琵琶。拟访鸱夷去，过吴王宫畔，犹认莲娃。倦途顿感兴废，潮尾咽蒹葭。试缓引孤吟，凭高纵目唯暮鸦。

太江东去
汪文溥

吊广州死难七十二烈士

歼良胡酷，刹那成宿草，痛哉英物！风马云车来往处。磷火宵飞石壁。
碧血殷山，赤虹贯日，白骨皑皑雪。九京游想，鬼雄还是人杰。回忆电掣雷
轰，犁庭扫穴，叱咤暗鸣发。大纛高牙空眼底，拉朽摧枯齐灭。天妒奇功，
问天不语，怒指冲冠发。毋忘在莒，年年记取今月。

